

藪煌鑊鈔

邊疆禁書甲集之五

新

皇

德

配

上

下

左

右

前

後

中

外

中華民國二十六年四月禹貢學會  
會據傳鈔本印

常鈞傳 耆獻類徵

常鈞葉赫那拉氏滿洲鑲紅旗人雍正四年由繙譯舉人考授內閣中書遷陝西潼關同知洊擢甘肅安西道陞吏議革職特旨授兵部主事充軍機章京乾隆二十一年從征噶爾尋奏補工部員外郎二十五年四月授江南淮海道未赴任擢正白旗漢軍副都統六月遷刑部侍郎八月命偕協辦大學士劉統勳清查江蘇藩庫銀額十一月復同赴江西鞠巡撫阿思哈臧款得實論罪如律命常鈞署江西巡撫奏言各省文武大吏恭齋摺其未蒙賞給奏匣而用夾板者僅以紙袋緘封綾幅包裹奉批後原封領回長途往返無難私啓請於夾板外用紙封固接縫處黏貼本職印花發回批摺請用兵部印花差官出都時酌用印花若干於咨取勘合內聲明兵部照數給發經部議准上飭該部豫將印花存貯軍機處備用不必臨時鈐印又奏出旗爲民者往來各省向未定查驗之例恐與逃旗相混請於入籍後令該管州縣查明年已成丁者各給鈐印手票其由京赴各省入籍者令該旗給照於入籍地方繳銷換給手票至八旗另記檔案養子開戶人等其往來他省應令本旗一體給照備驗從之十二月署安徽巡撫奏鉛銅船隻入境每有沿途偷漏謊報沈溺等弊請嗣後一經發覺將該地方官及派委員弁照失察盜賣漕糧例議處知情故縱者參革審究委員不



親往稽查任聽書役捏報者照徇庇例降三級調用如能獲盜賣銅鉛人犯亦照拏獲盜賣漕糧例議叙下部議行又奏向來直省秋審巡撫率同司道赴按察使衙門會審恐隨帶員役不無供應之煩請嗣後改歸撫署辦理上是之是月授倉場侍郎二十六年四月授河南巡撫七月祥符縣河水漫溢疏言河水由尉氏縣賈魯河套溜南趨請先將南岸各漫口逐段補築上以漫口盡行補築則大溜勢益湍急全趨缺口工程更難措手指示堵築各事宜並命籌辦賑務八月調江西巡撫未行詔豫省要工仍當實力肩任不得因五日京兆稍生觀望九月奏清查災黎戶口及被浸倉廩請先行動撥煮賑又言衛輝彰德懷慶河南開封等屬涸出地畝尙未乾燥難用牛力翻犁訪有犁樓及撒裂種二法犁樓法兩人代牛牽樓一人扶樓輕搖種從底出即已入地撒裂種法水退地涸裂縫必多握種播颺撒入縫隙二者專種溼地不用牛犁而生苗甚速見飭令各屬俱做照辦理得旨嘉獎十月事竣赴江西新任二十七年二月上南巡賜詩曰百戰得歸身九歌出牧臣無端泛河洛有術免沈淪熟路輕車易賢勞體恤頻西江魚米地休息且同民三月查奏前撫臣阿思哈清理軍屯做民田魚鱗式繪圖成冊嗣經接任撫臣胡寶瑔奏准令經徵各州縣詳開坵段四至造入交代一事兩冊日久滋弊今酌將四至段落併入魚鱗冊擬名鱗圖四至冊以歸畫一上允之五

月調甘肅巡撫閏五月上以回部底定錄從征諸臣功常鈞以前在西師屢著勞績恩賞雲騎尉世職二十八年五月請以靖逆通判移駐哈密安西同知移駐巴里坤七月請將張掖縣縣丞移駐東樂均如所請行八月疏言奉差人員內由兵部外由督撫覈給差牌應備夫馬廩給自有確數請責令該衙門給發勘合時將應付確數飭知首站即移知下站照辦書寫印花俟差員到站並無額外需索即將印花交差員自貼不必鈔寫勘牌仍將應付無誤之處轉移前途如差員需索該州縣即不給印花一面將應過夫馬若干並無缺少遲誤及差員如何需索據實聲明其有遺漏印花不貼惟差員是問若州縣應付遲誤准差員指名開報督撫查察下部議行十月請裁九亭巡檢改設鹽茶廳照磨從之十一月調湖北巡撫先是甘肅軍務殷繁將驛站改歸同知通判管理十二月常鈞奏紅城苦水二驛係平番縣地方靖邊大河二驛係武威縣地方仍歸各該縣管理從之二十九年正月入覲奏陝甘總督見駐肅州距西安寫遠於考驗弁兵稽查屬員均多未便上嘉其言甚切事理詔總督移駐蘭州並兼管巡撫事無庸更設巡撫原設撫標卽改爲督標其舊設西安督標改爲提標卽令固原提督回駐西安管轄所遺提標將涼州鎮總兵移駐固原管轄其涼州鎮標撥督標中軍副將一員統率六月疏言湖北應山縣距河南信陽州爲楚豫門戶向有東西兩路

西路自平靖關經應山安陸雲夢孝感等縣至楊店村爲驛路通衢東路自武勝關經廣水小河溪等處至楊店村係商賈捷徑覈算程途較西路實近百里嗣後應付差使請改由東路護送餉鞘仍由西路又武昌省城至江南江西等省驛路由江夏經黃岡縣至蘄水縣之巴水驛地勢窪下往來差使用船裝載多致稽遲請改由江夏之長山鋪經武昌縣之華容店黃岡縣之三江口渡江至巴水驛歸入正路又奏廣濟縣江隄向由該縣典史分管黃梅縣正隄月隄由該縣縣丞管理均係駐劄縣城離隄甚遠查廣濟縣之武穴鎮於乾隆二十六年移駐同知一員專司捕務其駐劄地方係黃梅一邑隄工適中之處請歸該同知統管將武穴巡檢移駐龍坪鎮黃梅縣縣丞移駐清江鎮分管隄工統歸武穴同知管轄均下部議行是月調雲南巡撫三十年五月疏言督撫會奏事件無論同城與否凡彼此商定者於摺首聯銜未商定者列主臺銜名會銜聲叙摺尾事干處分別定擬其緊要事件不及相商或會臺衙門意見不同均照在京九卿會議例另摺陳奏得旨俞允四月奏開化府屬之麻姑金廠新舊塘共十五口定爲十五牀向例月納課金近有八牀年久金盡請照錫板金廠例開除上允其請三十一年永昌順甯二府屬邊外土司經莽匪滋擾常鈞令參將劉智明等於九龍江勦敗之輒奏言賊匪聞風喪膽勢可解散已無須添兵會勦上以其未能直

擣巢穴切責之二月命湯聘往代調常鈞湖南巡撫六月常德府猝被水災劾沅陵縣知縣王元位並未履勘災區確查撫恤辰州府知府諸重光扶同欺飾請一併褫職上是之罷重光等官尋疏報查賑戶口請加高府城及濱江卑下隄工以資捍衛報聞八月疏言各省分發舉人得缺稍遲請分派繁缺州縣隨同幫辦上以分派幫辦是適蹈一缺兩官之弊不允是月桂陽州民侯學添被毆身死知州張宏燧以侯學添爲兇手及按察使宮兆麟覆訊正兇係侯七郎據實平反宏燧迴護原招會審各員亦持議參差事聞諭曰常鈞身爲巡撫乃於審理倫紀攸關命案一任屬員扶同弊混不能查究嚴參豈復勝封疆之任著來京陛見命侍郎期成額往鞠得實坐宏燧罪宏燧係常鈞曾經保奏人員訊有奉常鈞面諭與會審各員補具聯銜印稟倒提月日情事上以常鈞欺詐詔革職三十二年二月命常鈞自備資斧往喀什噶爾辦事五月調赴哈喇沙爾辦事九月疏言哈喇沙爾與榆林鎮所屬應行換班之屯田官兵請於明歲二月初旬乘耕作之候先派一半前往更換其新到兵丁令舊存兵丁帶領熟習至十月底再行更換一半得旨允行三十六年五月受代回京授三等侍衛五十年正月賜千叟宴常鈞與焉五十四年十月卒

右國史館本傳

# 敦煌雜鈔序

安西古荒服地羌戎所居秦漢以前遐哉邈矣自漢設敦煌置屬縣通西域關地數千里至於輪臺渠犂屯戍相望民物殷富極一時之盛魏晉六朝中原多故未遑遠略諸夷蠡屯雲擾固其所也洎乎隋唐駸駸復振肅代而後相繼沈淪割據并吞廢興不一延及宋元明之世凌夷播遷棄爲異域我朝統一區宇四夷咸賓自康熙五十四年戎醜跳梁致煩撻伐嘉峪關外古酒泉西鄙以及敦煌玉門之境漸以經理更置衛所遠而哈密悉隸版圖雍正間設鎮派防開屯籌餉分駐丞倅監司撫綏彈壓規模大定蓋自西戎即叙以來沙漠蕩平有日矣皇上纘承丕基揆文奮武德澤洽乎羣生聲教訖於無外然猶安不忘危綢繆未雨一切善後事宜斟酌損益以時措之而詳審周密無不扼其要而當其可綱舉目張煥然大備用增磐石之固垂之無窮余自己未秋分巡塞上於今年因天地之利脩政令之和通工惠商與民休息茲復恪遵廟算邊籌經營布置次第告成於凡風土情形亦稍悉其大略惟是古今沿革建置官屬山川城堡田賦井疆雖附載肅州新志及分見於各衛自輯志稿內思所以參互考訂確知其說自愧學識膚淺有志未能兼以荒僻遼遠之區載籍寥寥四方



通人學士轍跡所不至徵文考獻其道無由姑就舊聞新得自漢唐以迄今茲分晰義類鈔  
叢成編傳信傳疑則吾豈敢後之君子儻以脩志爲己任或於是編不無採擇其亦安西志  
之嚆矢乎昔乾隆七年歲次壬戌十月之望安西觀察副使葉河常鈞書於清潤齋

敦煌雜鈔目錄

卷上

河西四郡

關西七衛

安西廳

安西衛

柳溝衛

沙州衛

靖逆廳

靖逆衛

赤金衛

哈密

卷下

嘉峪關

赤金山

石油泉

玉門廢縣

赤斤蒙古衛

昌馬疏勒二河

觀音寺

苦峪城

窟窿河

三危山

鳴沙山

白龍堆

流沙

渥洼水



氏置水

敦煌廢郡

古長城

玉門關

陽關廢縣

罕東衛

罕東左衛

安定阿端二衛

典先衛

雷音寺

南山

天山

瀚海

巴里坤

土魯番

# 敦煌雜鈔卷上

葉河 常 鈞 和亭氏 輯

## 河西四郡

甘肅即漢之河西四郡武帝所開以斷匈奴右臂者蓋自蘭州爲金城郡乃昭帝時增置者過河而西歷紅城子莊浪鎮羌古浪六百餘里至涼州爲武威郡涼州之西歷永昌山丹四百餘里至甘州爲張掖郡甘州之西歷高臺鎮夷四百餘里至肅州爲酒泉郡肅州西出嘉峪關爲瓜沙赤金苦峪以至哈密等處則皆敦煌郡地也洪武五年宋國公馮勝下河西迺以嘉峪關爲限遂棄敦煌焉自莊浪歧而南三百餘里爲西寧衛古曰湟中自涼州歧而北二百餘里爲鎮番衛古曰姑臧此河西地形之大略也

## 關西七衛

肅鎮舊志云自蘭州渡河至肅州一千五百里又至嘉峪關七十里爲內地其在嘉峪關以外西至哈密亦一千五百里建設七衛曰哈密曰赤斤蒙古曰安定曰阿端曰曲先曰罕東曰罕東左此七衛者或元裔或土酋皆授官賜印世襲職貢而哈密尤居極邊總羌胡入貢

之要路藉以控制西域蕃衛肅州自成化而後數爲土魯番侵擾七衛人衆散徙流移不能自立於是遷其部落於關內安插肅州附近地方住牧而哈密竟爲土魯番所據西域諸夷之入貢者亦竟中嘉峪關不復取道於哈密矣

七衛詳見下卷

### 安西廳

轄安西柳溝沙州三衛在春秋戰國時爲西戎地秦月氏戎居之漢爲敦煌郡有縣六曰敦煌冥安效穀淵泉廣至龍勒晉分敦煌之宜禾伊吾冥安淵泉廣至五縣分酒泉之沙頭縣又別立會稽新鄉凡八縣爲晉昌郡後魏置敦煌常樂二郡後周并敦煌鳴沙平康效穀東鄉龍勒六縣爲鳴沙縣又并涼興廣至冥安淵泉爲涼興縣隋開皇初敦煌常樂二郡俱廢改涼興爲常樂大業復置敦煌郡改鳴沙爲敦煌唐置瓜沙二州屬河西道貞元後陷於吐蕃大中五年沙州首領張義潮以瓜沙伊肅甘十一州地來歸遂置歸義軍以義潮爲歸義節度使宋初仍爲回鶻所據景祐中元昊襲回鶻取瓜沙盡有河西之地元初立瓜州屬沙州路隸甘肅行中書省明爲赤斤蒙古沙州二衛地布隆吉以東柳溝堡尙屬赤斤蒙古始成化後土魯番侵掠正德中徙肅州塞內嘉靖二年閉嘉峪關其地遂爲土魯番所有本朝定鼎西夷嚮化瓜沙盡入版圖雍正元年置安西同知駐布隆吉鎮安西衛沙州所三年升

沙州爲衛又改靖逆通判所屬之柳溝所隸安西廳五年升衛六年另建安西鎮城於大灣移治安西新城領衛三曰安西柳溝沙州雍正十一年移駐瓜州設安西兵備道統轄焉

按古瓜州在今鎮城西八十里卽晉昌舊治相沿唐名今之瓜州非故城地雍正十一年建築五堡安插土魯番回民封額敏和卓爲護國公以統其衆復於回堡之外添築瓜州城在安西城西南三十里周圍四里一分開東西二門設有參將統領員弁兵丁以資彈壓並移駐安西同知於此管理民回屯田水利一切事務又理藩院派出部郎一員筆帖式一員駐瓜照看新舊交錯二年更換至乾隆七年於檄飭事案內添給管理回民關防并歲支公費銀兩仍照駐哈部郎等一例支給口食鹽菜銀兩各項應差人役在瓜州營存城兵內撥派三十名分班輪流應役其回民命盜案件向無一定章程乾隆六年經尹督院 題請嗣後兩造俱係回民應令札薩克公將回犯拘交部郎會同札薩克公審明照榆寧之例咨報理藩院議覆題結若人民與回民交涉命盜等案令安西同知會同部郎審擬詳報安西道核審解司詳院咨題完結至安西廳所轄地方如屬於衛所者應以衛所爲專管該廳爲兼轄不屬於衛所者即以該廳爲專管以安西鎮道爲統轄如應令札薩克公拘交之回民交與部郎嚴催依限獲解倘有遲違將札薩克公等及承緝回員報部議處地方民員免其查參



等因經刑部吏部理藩院會議覆准續經議詳凡兩造俱係回民案件應令將人犯交給札薩克公自行經管其民回交涉案件凡相驗拘犯報解等事責成各衛就近辦理至疎防緝捕等事亦均以各衛爲專管安西道爲審轉衙門回民所犯軍流徒罪俱照苗疆辦理之例准折枷責完結咨部覆准各在案

### 安西衛

在漢爲敦煌郡冥安縣地晉曰宜安即冥安屬敦煌又分置晉昌郡周併入涼興縣唐置瓜州尋沒於吐蕃五代時瓜州與吐蕃雜處曹義金遣使入貢於後唐以義金爲歸義節度使宋入於西夏元至元十四年立瓜州二十八年徙居民於肅州僅存其名明爲沙州衛地正德後避土魯番內徙肅州塞下嘉靖後盡棄其地本朝雍正元年置安西衛於布隆吉六年後置安西鎮城隸安西同知按安西衛在三危流沙以東爲唐虞禹貢雍州西邊之地春秋時名爲瓜州有允姓之戎雜居史記正義云秦漢之際烏孫祁居於此後爲月氏所據匈奴破殺月氏使其部昆邪王休屠王分地住牧武威張掖間漢武帝使將軍霍去病伐匈奴昆邪王殺休屠王并將其衆來降因置酒泉郡以其地屬焉後又分酒泉置敦煌郡此地爲敦煌縣境漢書註云瓜州在其境內魏晉之世又分敦煌郡地置有晉昌會稽常樂廣夏等

郡後周通判爲晉昌郡唐爲瓜或州稱晉昌郡設刺史都督以鎮之廣德後陷於吐蕃大中時收復以歸義節度使張義潮兼領宋仁宗時陷於趙元昊元平西夏隸甘肅行省明洪武初宋國公馮勝下河西竟畫嘉峪關爲限棄之邊外關西建設七衛夷人此爲赤斤罕東交界之地嘉靖中夷人內遷更同甌脫本朝經理關西始建安西鎮城原在布隆吉至雍正五年始於今大灣地方杜爾柏津西北建築新城周圍六里七分開四門於雍正六年告竣遂移舊安西文武駐劄本城屹爲重鎮所屬之百齊堡於雍正十二年改移南路云至乾隆六年經軍機大臣議奏川陝尹督院議覆查大學士條奏西路善後事宜安西總兵改設提督將嘉峪關以西哈密以東悉歸管轄甘涼肅等處戰兵及一切援剿機宜俱聽節制調遣除本標原額兵三千名外暫停增添將中營遊擊改爲中軍參將添設城守營都司一員千總一員把總二員添馬三步七兵五百名再改設靖逆協添兵五百名塔兒灣添兵二百名橋灣添兵一百名共添新兵一千三百名至標協各營歷扣親丁公費名糧照數補實以足八千五百名之正額其布隆吉赤惠等處防兵五千名於改設提督新兵撥到之後卽行撤回而善後之規模定矣又於安西城上原建瞭房每座中一間拆通後牆添築礮位平臺二十四處安設劈山礮二十四位其餘安靖所屬各城堡制造四腿木架俱安子母礮至環墩子

木龍泉二道林馬蓮井子各要隘之處議准添設腰卡引墩以資巡哨并改設塘站直達鎮城其安沙等五衛團練屯兵通共一千七百八十二名各設戶長管束稽查酌撥甘涼二標營多餘鳥槍每人給領一桿專責各衛千總同各營選派目兵按期演習需用鉛彈火藥用捐種公田所收糧石內制備演放地方文武各官於農隙時查點指授使之隨便學習守望相助皆有備無患之道也赤金所後改爲衛復設守備五衛各添設千總一員協辦庶務於官制亦稍備焉安西估造衛署兵房乾隆七年八月內竣工於城中東西開井四眼南北兩街各開一井新建兵房東西各開二井以利兵民之用嗣後餘丁及辭伍人等并頂戶認丁情愿入籍者分別戶口多寡撥給城內隙地聽其蓋房居住並於鎮城東門外關廂周圍建築護牆一道角墩四座東西安設門臺俾商民安堵無恐又經議覆口外糧餉事宜向因軍需係肅州道經管是以統歸該道管理今大兵旣撤並無軍需其口外糧餉等項俱交安西道經理復經註批俟撤防後移交接管而哈密糧餉民事俱歸安西道總轄云

柳溝衛

在漢爲敦煌郡淵泉縣地晉曰深泉卽淵泉屬敦煌郡又分置晉昌郡周併入涼興縣唐屬瓜州後陷於吐蕃宋入西夏元時爲瓜州地屬沙州路明爲赤斤蒙古衛地成化中哈密爲



土魯番所據築苦峪城移哈密及寄居赤斤者以居之肅州志苦峪城至肅州四百里當在今柳溝境內正德中土魯番益張遣兵分掠苦峪嘉靖三年閉嘉峪關部衆屬土魯番其地多檉柳有水泉東則十道柳溝西則窟窿河黑水河忒不忒河本朝康熙五十六年初設柳溝所於四道溝建築城堡招徠戶民兼設柳溝通判雍正元年於今布隆吉建安西鎮城周圍六里三分開四門並改通判治靖逆而以所城屬安西雍正五年復建安西鎮城於大灣而陞柳溝所爲衛移治於布隆吉隸安西同知其四道溝之舊城并續建之踏實雙塔橋灣等堡皆屬焉於乾隆六年議奏善後事宜案內以橋灣地方路通哈密咽喉原奏添馬三百七兵一百名外仍將柳溝都司并原設兵二百名移駐橋灣歸布隆吉遊擊統轄於舊城東西接築新城周圍八分計長一百四十四丈并將舊城一併接高幫厚共南北二門南曰廣源北曰平遠建蓋衙署兵房移住焉而柳溝舊有兵房衙署以及橋灣城外向時之運糧棚廠修改房屋爲防兵居住者俱經拆卸木植運交工所搭用於乾隆七年九月內竣工

### 沙州衛

古三危地羌戎所居左傳范宣子謂戎子駒支昔秦人迫逐乃祖吾離於瓜州其先爲允姓陰戎之祖與三苗俱放三危者也秦及漢初爲月氏匈奴所據武帝後元年分酒泉置敦煌

郡晉因之元帝時張駿分敦煌晉昌高昌三郡西域都護而戊己校尉玉門大護軍三營爲沙州張祐又以敦煌郡置商州其後李暉據敦煌稱西涼公後魏置敦煌郡周置鳴沙縣水經注敦煌南七里有鳴沙山故亦曰沙州隋大業初復置敦煌郡改鳴沙爲敦煌唐武德五年置西沙州貞觀七年曰沙州鎮敦煌壽昌二縣神龍元年置豆盧軍貞元後盡沒於吐蕃宋初爲回鶻所據太宗時曹元家以州歸於宋景祐中爲元昊所據元復取之至元十四年復立沙州十七年升爲沙州路明永樂初置沙州衛以酋長困卽來爲指揮使賜誥印正德十年爲哈密瓦剌二部復逼走附塞下正統中沙州久爲罕東指揮班麻思結駐牧困卽來子喃哥謀森瓦刺甘肅鎮將任禮帥兵收其全部入塞居之甘州時土魯番侵據哈密班麻思結孫只克請自立一衛與相抗遂於沙州故城立罕東左衛正德十一年只克子乞台衰弱不振徙肅州塞內其部下服屬土魯番沙州遂廢本朝雍正元年置沙州所三年升衛隸安西同知 按沙州衛在唐虞禹貢爲三危流沙之地見於書傳歷歷可考周衰淪於戎狄秦漢之際月氏據之匈奴破殺月氏亦屬昆邪王住牧霍將軍破降昆邪以其地爲敦煌郡屬六縣兼有今安西柳溝東包靖逆方與酒泉接壤魏晉因之至前涼張氏置沙州及晉昌郡符秦元魏更析爲會稽廣夏常樂等郡非漢敦煌全境矣唐因之或稱沙州或稱敦煌郡

而以晉昌等郡并爲瓜州由此瓜沙並峙焉天寶之亂吐蕃吞噬河隴諸城失守皆在肅代德順之世惟沙州之陷獨後蓋在憲宗元和十四年而大中復河湟最先倡義首領張義潮逐虜帥歸唐遂建歸義軍於沙州以義潮爲節度使五代朱梁時張氏世絕沙人推長史曹義金爲帥請命中朝授本軍節度傅子孫至宋仁宗時爲趙元昊所陷元滅夏置沙州路總管府而以瓜州隸焉明洪武初宋國公馮勝兵下河西元守臣委的掠人民遷入沙漠時有巫師藏番僧曰哥哥把失乘青牛誦經乞化號青牛和尚遊至沙州界內娶達女爲妻生子至孫俺章混稱屬達修貢永樂二年以俺章爲都督掌印朝貢不絕正德中避土魯番侵擾乃內徙肅州住牧卽日羔刺之族也本朝康熙五十四年夷酋作逆出師征討嘉峪關外漸加修復初置赤金靖逆二衛所雍正初柳溝安西沙州以次設衛原任岳督院原議在沙州設鎮旣以安西爲適中之地建立安西鎮於是沙州特設副協駐防俾輔車相依保障邊圉屹爲衝要云沙州之西本有故城卽漢敦煌郡治經黨水北衝圮其東面雍正三年於故城東另築衛城周圍三里三分開東西南三門雍正五年添築黃墩堡於乾隆六年議奏善後事宜案內以衛城僅容衙署兵房並無餘地民居皆在城外自築護牆以爲憑依現今戶口滋繁商民雜遷而舊築護牆剝落坍塌難資捍禦乃悉行拆毀另從衛城東南二面廻抱西

北二角接築新護城五里四分共長九百七十二丈城身頂底高寬及垛牆女牆尺寸俱較減於舊城如同關廂式樣四面築門臺四座東曰通安南曰時阜西曰廣闊北曰歸極每臺上建脊房三間并築角墩四座於乾隆七年九月內工竣

靖逆廳

轄靖逆赤金二衛在周末爲西戎地秦月氏居之漢爲酒泉敦煌二郡地酒泉領縣曰玉門曰延壽師古曰闕駟云漢罷玉門關屯徙其人於此置縣元和志縣東至州二百二十里五代晉高居誨使於闐記云肅州渡金河百里又西百里出玉門關卽古玉門縣非沙州之玉門關也今赤金衛去肅州二百四十里與古玉門縣道里相做寰宇記延壽縣在酒泉郡西按古延壽縣地在今赤金境內自赤金以西方屬古敦煌郡地晉國之玉門以西屬晉昌郡後爲西涼李嵩所據隋屬敦煌郡地唐爲瓜肅二州地玉門以東屬肅州以西屬瓜州隸隴右道貞元後盡陷吐蕃宋初仍爲回鶻所據景祐中元昊襲回鶻取之元屬肅州沙州二路隸甘肅行中書省明永樂二年置赤斤蒙古衛在嘉峪關西二百四十里今在靖逆衛東六十里靖逆衛所屬俱赤斤蒙古地也正德中土魯番侵擾無寧歲乃內徙肅州嘉靖三年閉嘉峪關絕貢其地盡廢本朝定鼎西夷內附康熙五十七年置靖逆同知雍正三年裁以柳

溝通判改調靖逆領靖逆衛赤金所而統於安西兵備道

靖逆衛

在漢爲冥安縣地屬敦煌郡乃最東之邑與酒泉天衣縣接壤者也漢書地理志云宜安縣有南籍端水出南羌中西北入其澤溉民田卽今之疏勒河水介於柳溝靖逆之間雖今之衛城不必卽古之縣治而其爲冥安縣地無疑晉屬晉昌郡其後增置郡縣分屬不常唐屬瓜州廣德以後陷吐蕃大中復河湟宋陷元昊俱隨瓜州爲遷變元屬沙州路明初棄敦煌建設關西七衛夷人而此地不在七衛之數名曰苦峪衛又名達兒兔不知何時建立嘉靖初被土魯番侵擾諸夷內徙有盼卜朮加族投來肅州地方稱係苦峪城苦朮之部屬夫苦朮者赤斤酋長之名也似此不過赤斤分居之部落耳何以並立稱衛自此之後遂爲空城本朝康熙五十七年將嘉峪關外漸次經理築城於達兒兔之南周圍二里一分五釐開南北二門設靖逆衛隸靖逆同知雍正三年裁同知改柳溝通判爲靖逆通判移駐靖逆兼轄赤金雍正十二年添築塔兒灣堡於乾隆六年議奏善後事宜案內將靖逆營改爲靖逆協添兵五百名合原額共馬六步四兵八百名添設副將一員都司一員千總一員把總三員於舊城東面接築新城開二門南曰綏和北曰懷柔計長一里一分五釐高寬丈尺規模悉



與舊城相同而舊城之巖剝坍塌處所及門洞城樓一例修補完固以重嚴疆其塔兒灣地方爲靖逆北面藩籬添設守備一員把總一員又馬三步七兵二百名並赤金一營統歸靖逆協管轄其城垣之塌剝者及門洞城樓亦逐加修整俱於乾隆七年九月內竣工

赤金衛

在西漢爲酒泉郡玉門縣地後漢改延壽晉因之後魏置會稽郡後周廢郡併會稽新鄉延興爲會稽縣延興卽延壽隋開皇中改爲玉門併得魏玉門郡地唐屬肅州開元中經吐蕃攻陷因其地置玉門軍天寶十四年廢軍爲縣貞元後隨州陷廢宋入於西夏元屬肅州路明初畫嘉峪關爲限棄之邊外永樂二年有塔力尼稱丞相苦尤子率所部來降建赤斤蒙古所以塔力尼爲千戶賜誥印八年升爲衛屢進都督僉事正德八年土魯番遣將據哈密大掠赤斤奪其印而去彭澤經略西域始以歸來印赤斤衰弱不能自存乃內徙肅州之南山其城遂空衛印屬都督鎮南東掌管嘉靖後閉關絕貢嘉峪以西不復經理本朝康熙五十四年因澤旺阿喇蒲坦侵犯哈密出師征討調兵駐防開設屯田安插民戶五十六年於舊城西面建築新城周圍一里一分開南北二門合舊城共二里三分零舊城南門如故五十七年設赤金衛雍正五年添築惠回堡改衛守備爲守禦千戶所屬靖逆廳所轄初隸肅

州道改隸安西兵備道於乾隆六年議奏善後事宜案內仍改衛治復設衛守備一員并添設衛千總云 按赤金東北湃帶湖花海子一帶西至靖逆之哨防營布魯湖等處直通北套阿濟必濟之路廣遠空闊並無屏蔽雍正十一年於懇請添築墩臺等事案內經劉督院奏請添設墩臺一十八座酌定遠近疎密安設連舊墩共二十座向派步兵瞭望現在議准添設腰卡引墩改撥馬兵巡哨聯絡號火接傳聲兒而沿邊防範益加嚴密矣

### 哈密

古伊吾盧地在敦煌郡北大磧之外爲西北諸夷往來要路地宜五穀桑麻葡萄故漢嘗與匈奴爭之以制西域肅鎮舊志云在沙州西北八百里去嘉峪關一千五百里漢武帝開設河西四郡卽今甘涼肅及口外安西瓜沙之境又出玉門通西域置都護及戊己校尉已絕北虜西番之交當時謂之斷匈奴右臂則今之哈密云當遣將出兵於此伐破匈奴然尙未有建置至後漢明帝遣將破匈奴始置宜禾都尉爲屯田兵鎮之所亦未設郡縣至晉置宜禾縣屬敦煌郡後魏始置伊吾郡後又爲胡戎所據唐貞觀初內附置西伊州尋改伊州或爲伊吾郡置都督府領縣三曰伊吾曰納職曰尋遠天寶元年置十道節度經略使安西節度撫寧西域統龜茲於闐焉耆疏勒四國謂之安西四鎮治龜茲城皆伊州以西地也後吐

蕃爲患相繼淪沒大中收復以來懿僖而後中原多故不遑經略僅羈縻而已五代時號胡盧磧小月氏遺種居之而宋時伊州將陳氏又云自先自唐開元中領州凡數十世豈陳氏亦降於吐蕃而弗替其職乎元封族子忽納失里爲威武王卒其弟安克帖木兒嗣永樂初遣使朝貢改封忠順王賜金印始建哈密衛土魯番在其西一千五百里瓦刺達子在其北百里凡西域入貢其夷使方物悉道哈密驛上之亦漢武遺意也所統有回回畏兀兒哈刺灰三種各以其酋目爲都督佐之忠順王卒其兄子脫脫俘居中國乃襲封遣還脫脫死子孛羅帖木兒嗣帖木兒死無嗣王母理國事國勢寢微成化九年土魯番速檀阿力調哈密夷家掠赤斤蒙古諸夷王母不從阿力掠王母金印以歸哈密諸夷無主遂散居苦峪諸山谷或歸附居肅州亦有隨土魯番去者成化十四年阿力死子阿黑麻嗣十八年甘肅守臣奏王母外孫畏兀兒都督罕慎現避居苦峪因以之襲封二十年遣兵送入哈密宏治元年阿黑麻誘罕慎殺之遣使入貢求立爲忠順王領西域職貢兵部尙書馬文昇議不可乃立安定王族孫陝巴爲忠順王安定王者名亦板丹與忠順王脫脫同族故立之又令頭目奄克孛刺阿木郎輔陝巴至哈密阿黑麻又入哈密殺阿木郎虜陝巴及金印去後復入哈密自稱可汗大掠罕東諸夷已而西去令頭目牙木蘭據哈密八年巡撫許進總兵劉寧襲哈



密牙木蘭遜去阿黑麻獻還陝巴十一年王越總制三邊兼理哈密仍復陝巴舊封修哈密城以回回都督寫亦虎仙畏兀兒都督奄克阿孛羅哈喇灰都督并迭力迷失領夷族三種輔之其後阿黑麻死滿速兒嗣陝巴嗜酒培克失衆心部下阿孛喇等咸怨十七年陰搆阿黑麻別子真帖木兒入哈密陝巴懼挈家走苦峪時肅州百戶董傑與哈密酋帥奄克孛刺抓哈密謀誅阿孛刺送陝巴還國真帖木兒還土魯番正德元年陝巴死子并牙郎嗣八年并牙郎以貪殘致怨走入土魯番滿速兒遣人據哈密要重賞時總制彭澤量犒金幣仍許後增幣遂送印還併退哈密城而留并牙郎不遣旣又索取無厭復遣其酋目據哈密十一年滿速兒擁衆入寇至免兒壩遊擊芮寧禦之戰沒賊薄肅州城兵備副使陳九疇固守絕其內應賊知事洩慮援兵至大掠而還嘉靖三年閉嘉峪關絕西域貢滿速兒又入寇直抵甘州闔鎮震惶時九疇已起任甘肅巡撫力禦之賊始遁七年起兵部尙書王瓊經略不過還其羈使許其通貢用以少弭侵軼其於完守哈密之遠略置而弗論自是哈密都督札吉孛守其部落居肅州東關其金印自獻還時卽貯甘州庫哈密竟不復立市土魯番猶許其通貢其後哈密爲失拜烟答子米兒馬黑麻所有服屬土魯番朝廷猶令比歲一貢迄隆慶萬歷間猶入貢不絕然自後首領竟係土魯番回子非復元裔矣本朝定鼎四夷咸臣哈密

回長奉貢略世襲封後有總領達爾罕伯克歸順封爲札薩克給與印信將屬下小頭目編置佐領十四人康熙五十四年澤旺阿喇蒲坦肆逆侵擾哈密出師征討爰於舊城之東北築建新城周圍二里零輪派提鎮重臣統領官兵駐防以飭邊備 按達爾罕伯克者本回子頭目一名厄不都刺達爾罕伯克初服屬於準噶爾準噶遣之住牧哈密有馬數十匹從者數十人後牲畜漸蕃人口亦衆傳子郭伯歸附我朝遣副將一員守備一員領兵二百名戍之乃自成部落阻絕澤旺阿喇蒲坦市易孔道遂開邊釁再傳至額敏幼生額敏於肅州及壯始歸康熙中授爲札薩克封貝子乾隆五年額敏卒子玉素富嗣封護國公即今札薩克公也所居在舊城之內自雍正四年派有理藩院部郎二員筆帖式二員駐劄於此辦理回夷事務新舊交錯二年更換至乾隆七年於檄飭事案內頒給辦理回民關防部郎筆帖式等及領催跟役歲需口食鹽菜銀兩粳粟米石仍照例支給外每年添給公費銀兩其應差人役向例在哈密駐防兵內撥兵三十名分班輪流交錯應役哈密駐防向派甘涼西肅安五鎮馬步兵五千名有提鎮副將等員總統管領至乾隆六年議奏善後事宜案內於安西甘涼肅四處各派兵五百共二千名於塔兒納沁及三堡各分兵三百名蔡巴什湖分兵二百名各派遊擊都司守備帶領千把駐防其餘俱駐哈密城內專令副將一員統之給與

統領關防員弁兵丁俱二年一班輪流更換其餘三千名悉令撤回所有防兵原種蔡巴什湖兵屯一萬畝招佃田民承種每五十畝撥給牲畜二頭酌估價值分作五年帶徵五年內倒斃者驗明扣免兵屯內舊存農具概行賞給以示優卹其糜麥穀各色籽種令札薩克公出具總領卽在新收屯糧內借給於秋收後扣還下剩糧石照安西屯田之例官民四六分收每年約種穀田四十二頃可得草八九萬束儘數官收以供冬春牧養馬匹之用亦與官分四分之數相符每籽種一石應借口糧五斗將存貯白麵折放每口糧一京石給以白麵一百一十觔俟秋收旣分糧後交還小麥一京石仍許照一麥二穀之例糜穀兼收以上事宜令管糧文員會同札薩克公秉公辦理如有拖欠逃匿責成札薩克公究追各處渠道令蔡湖守備仍督兵修防回民協力幫助并交糧員稽查又有原種蔡湖塔爾沁兩處餘田各三千畝所收糧石向係增給防兵雜麵及牲畜喂料并管中公費等項等將塔爾沁餘田因地氣稍寒停種外蔡湖餘田三千畝仍令防兵就近屯種地免拋荒兵無減食一切悉照兵屯舊例辦理至哈密軍務令新設之安西提督管轄屯務民事令安西道總管其糧員一切收支錢糧事件俱令報道稽查核轉該道每隔一年親往巡查一次遇有差役守催事件聽該道自行發票沿途塘站應付馬匹以符體制其糧員文冊到站亦一體傳遞嗣後糧

員停派州縣於陝甘兩省同知通判內酌派一員令其管理屯糧民詞等事再於府州縣首領佐貳內酌派一員專管收麥仍二年更換請給管理哈密屯田糧餉關防各撥給空閒兵房居住於本任養廉之外添給公費銀兩雇募書辦酌給工食於甘肅派撥伴作一名應用三年一換亦酌給口糧其辦理回民命盜案件悉照審辦瓜州五堡回民章程再哈密糧城積年存貯軍屯各色糧石內支兵粟米一項自乾隆七年起每兵每月米四麵六搭放支舊存新酌量出易舊存白麵除每年折放回民口糧及搭支兵糧外每年春間借給回民白麵一十一萬觔秋後交麥一千石有願還糜穀者亦以一麥二穀計算回民既資接濟而積糧又得出陳易新又黃蘆岡長流水二站存貯軍需蘆草露積多年霉爛已甚旋奉尹督院行令確查將實在不堪喂馬者詳請開除哈密糧城并無倉廩所存糧石向係露積通風議將糧垛移貯大城南北閒空處所添築護牆火道舊有糧城無庸增修所需糧垛墊底木植每垛加高二層動支工價採買自乾隆六年起每年准銷包苦口袋毡片麻繩等項大城安設劈山礮位挖溝墊沙亦可施放停止估築礮臺其北山一帶安設卡倫各事宜安西提督永相度險要逐加料理以期邊疆寧謐而善後之策於斯備焉

# 敦煌雜鈔卷下

葉河常鈞和亭氏輯

## 嘉峪關

在肅州西七十里嘉峪山西麓乃漢遮虜障之處卽古之玉石山以其常出玉故名明洪武五年馮勝下河西以嘉峪關爲中外巨防西域入貢必由此築土城週二百二十丈宏治七年以土魯番叛閉嘉峪關絕西域貢八年巡撫許進出嘉峪關入哈密土魯番遁去兵備道李端澄構大樓以壯觀望之四達嘉靖十八年尙書翟鑾行邊言嘉峪關最臨邊境爲河西第一隘口牆濠淤損宜加修葺仍於濠內奏立邊牆每五里設墩臺一座以爲保障因使兵備道李涵監築起於卯來泉之南訖於野麻灣之東北版築甚堅耰耨不能入二十六年巡撫楊博言嘉峪關外先年止有近關大草灘石烟墩黑山兒墩臺三座嘉靖八年添築驪馬城上柏楊下柏楊回回墓紅泉墩臺五座今行相視又宜於榆樹泉三條溝火燒溝古墩兒添築墩臺四座隆慶二年總督王崇古言嘉峪關三面臨戎勢甚孤縣宜設守備防禦從之本朝設有遊擊按嘉峪關坡下有峪泉卽九眼泉也冬夏澄清碧波不竭極西邊關有此



湧泉沃地數頃民資以生又嘉峪山石可作硯色青紫肌理微粗與崆峒栗亭硯相髣

### 赤金山

在赤金衛西三十里即赤斤蒙古之山峽也當北來西去之通道明參將霍麒追賊至此大捷又遊擊何淮自鉢和寺追賊於嘉峪關又追敗之於赤金山蓋襲賊之徑道也

### 石油泉

後漢書註云延壽縣南有山石出泉水大加筥簾注池爲溝其水有肥如煮肉泊羹羹永永如不凝膏然之極明不可食縣人謂之石漆即今之石油泉也元和志云在玉門縣東一百八十里泉中有苔如肥肉然之極明周武帝宣政中突厥圍酒泉取此脂然火焚其攻具突厥以水沃救愈明酒泉賴以獲濟又赤金志云赤金東南一百五十里有石油泉油生水面色黑氣臭土人取以燃燈可治瘡癬

### 玉門廢縣

在肅州西漢置屬酒泉郡非敦煌之玉門關也闕駟曰漢罷玉門關屯戍徙其人於此置縣故名又晉志元康五年別立會稽新鄉二縣屬晉昌郡隋志敦煌領玉門縣魏置會稽郡周廢郡併會稽新鄉延興縣爲會稽縣開皇中改爲玉門併得魏玉門郡地唐屬肅州元和志

縣東至州二百二十里本漢舊縣後魏孝明帝改爲玉門郡周武帝省入會稽縣隋改爲玉門縣開元中爲吐蕃所陷因於縣城置玉門軍天寶十四年哥舒翰奏廢軍重置縣新唐書貞觀元年廢後復置隨州陷廢杜氏通典晉昌郡南至新鄉鎮一百八十里五代晉高居誨使於闐記自肅州渡金河西百里出天門關又西百里出玉門關經吐蕃界亦卽故縣也寰宇記玉門縣長三百里有石門周匝山間裁徑二十里衆泉北流入延興海又十六國春秋建初三年分酒泉中州人五千戶置廣夏郡又分置武威武興張掖三郡皆無攷今按舊志云玉門舊縣在肅州衛西二百里漢光武絕西域遷玉門人居此然西漢時已有之不始於光武唐武德中改爲軍基址向存要之在酒泉者爲縣在敦煌者爲關本不相涉此之玉門縣在赤金地方無疑

### 赤斤蒙古衛

肅鎮舊志嘉峪關西行二十里曰大草灘又三十里曰黑山兒又七十里曰回回墓又西四十里曰駙馬城並設墩臺置瞭卒城西八十里卽赤斤蒙古本漢敦煌郡地明洪武十三年都督濮英西討次古城獲蒙古平章忽都帖木兒進至赤斤站獲幽王亦憐直及其部曲千四百人金印一師還復爲蒙古部人所據永樂二年有塔力尼者自稱丞相苦尤子率所部

來歸乃設赤斤蒙古所尋升衛至賞卜塔兒幼弱成化十九年鄰番也克力來侵赤斤殘破不復振正德中被土魯番蹂躪部衆不能自存盡內徙肅州之南山其城遂空嘉靖七年授賞卜塔兒子鎖南東爲都督統治其部帳又按一統志衛東至肅州界四百三十里與鎮志不合而自關至回回墓亦與今道里不同其舊城基址俱無攷惟今之衛城舊基在焉

### 昌馬疏勒二河

昌馬河源在靖逆西南疏勒河源在靖逆東南至上龍王廟乃其會合處從此分兩支其一支向東北者繞靖逆城東南過腰井子經塔兒灣至哈沙免等處其一支向西北者繞靖逆城西迤北經柳溝堡而西十道溝水入之匯爲大河過橋灣經小灣出安西城北西達於黨河之尾歸於哈拉腦兒今獨名疏勒者以水有大小不同耳其實有兩水也

### 觀音寺

在靖逆南門外一里碧瓦朱欄雕甍繡栱一帶長堤植高柳數十株夾以杏花三四樹初夏開放映帶迴環遊人畢集胡琴羌笛歌唱喧闐真塞外上剎名區爲靖逆第一勝境

### 苦峪城

在廢瓜州東至肅州四百里明天順四年哈密忠順王母努溫答失里主國被北酋亂加思



閱襲破其城率親屬部衆走苦峪成化中哈密都督罕慎又爲土魯番阿力所襲退居苦峪時罕慎方倚罕東赤斤而二衛自相仇殺罕慎勢益孤朝命築苦峪城移哈密衛於其地其後罕慎糾衆襲哈密破之還居故土宏治中忠順王陝巴爲土魯番阿黑麻所執哈密居人亦以窮窘難守盡焚室廬走肅州詔賜牛具歸穀種并發流寓三種番人及哈密之寄居赤斤者盡赴苦峪及瓜州沙州俾自耕牧以圖興復正德後土魯番益張苦峪諸城皆爲所殘破按關外俗稱達兒免卽苦峪之謂所以靖逆本名苦峪人謂之達兒免茲苦峪城人稱上達兒免以別於靖逆也今遺有空城規模頗爲雄壯關廂亦大城內荆榛頽垣敗牆相望井尙有水并木欄又有一道乾河極闊兩岸叢樹映帶頗勝城壁佛像最多大抵番僧所爲城外北面多紅柳黃芩耕地尙少西南二面則平疇千頃沃野彌望溝塍遺跡繡錯紛然窮其渠道所由在西北幾二百里於靖逆之上龍王廟疏勒昌馬二河會合處引來今俱乾涸無水渠身砂礫壅塞此城遂廢城東半里有大寺遺基一所牆址稍存中間大塔一座基高丈餘塔高數丈前有小塔五座亦尙高三四丈土中尋得半截斷碑字畫不甚剝落一面逼真唐體雖未爲唐人之極佳者亦斷非唐後之書因首尾殘缺僅存中段文義不能連貫而總係大中時復河湟張義潮歸唐授爵大興屯墾水利疏通荷鍤如雲萬億京坻稱功頌德

等語其一面字體流入五代宋初文意與前大略相同似頌曹義金之語夫張曹二公本治沙州則瓜州亦其兼統此處總係瓜州地方但當日此處地名碑文缺落無考

窟窿河

在柳溝衛西三十餘里雙塔堡之東舊名札噶爾烏珠發源土葫蘆溝東西分流經雙塔堡入流疏勒河內多大穴上小下大深邃不測牲畜誤入即不能出好事者墜石試之莫竟其底以盤渦湍急故亦不能及遠云

三危山

尚書孔安國傳三危西裔之山舜竄三苗於三危禹貢三危既宅是也隋志敦煌縣有三危山括地志山在沙州東南三十里山有三峯故名都司志三危爲沙州望山俗名昇雨山今在城東南三十里三峯聳峙如危欲墮故名

鳴沙山

元和志鳴沙山一名神沙山在沙州城南七里其山積沙爲之峯巒危峭踰於山石四面皆沙隴背如刀刃人登之卽鳴隨足頽落經宿風吹輒復還如舊有泉一水名曰沙井綿歷古今沙填不滿水極甘美舊唐書又名沙角山天氣晴朗時沙鳴聞於城內又五代晉高居誨

記云在瓜州南十里冬夏殷殷有聲如雷禹貢所謂流沙也今按山在州南積沙而成黨河經其陽由山之西北流東麓有千佛祠山下有月牙泉沙挾風而飛響泉映月而無塵終古光音僊靈異境來遊者流連不能去

### 白龍堆

郡國記敦煌正西關外有白龍堆沙形如土龍身無頭有尾高大者二三丈卑者丈餘東倚三危北望蒲昌是爲西極要路

### 流沙

後周書鄯善西北有流沙數百里夏日有熱風爲行旅之患風之將至惟老駝知之卽鳴而聚立埋其口鼻於沙中人每以爲候亦卽擁蔽口鼻其風迅駛期須過盡若不防者必致危殆顏師古曰流沙在敦煌西八十里明一統志流沙磧在玉門關外有三斷山石極大謂之三龍山

### 渥洼水

在沙州境內漢元鼎四年天馬生渥洼水中武帝得之作天馬之歌其詞曰太一况天馬下霑赤汗沫流赭志俶儻精權奇籊浮雲晦上池體容與池萬里今安匹龍爲友漢書註云李

斐曰南陽新野有暴利長當武帝時遭刑屯田敦煌界數於此水傍見群野馬中有奇異者與凡馬來飲此水利長作土人持勒鞞於水傍後馬玩習久之代土人持勒鞞收得其馬獻之欲神異此馬云從水中出

氏置水

漢志龍勒縣有氏置水出南羌中東北入澤漑民田五代史沙州西渡都鄉河即此今俗名黨河按沙州志云黨河源自南山來北流繞城東西藉以漑田卽氏置水今分爲五大渠餘流從黃墩北去乃漸微矣

敦煌廢郡

在肅州西今沙州衛西古瓜州亦月氏戎地漢武帝元鼎六年分酒泉置敦煌郡應劭曰敦大也煌盛也晉志郡治昌蒲領敦煌縣十六國春秋晉咸康元年張駿分敦煌晉昌高昌三郡及西域都護戊己校尉玉門大護軍三營爲沙州水經注敦煌郡南七里有鳴沙山故亦曰沙州隋裴矩西域圖記自敦煌至於西海凡三道北道從伊吾至蒲類海中道從高昌南道從鄯善總輳敦煌爲咽喉之地隋志敦煌郡舊連瓜州治敦煌縣周併入鳴沙縣大業初復置郡改鳴沙爲敦煌唐復置沙州元和志沙州東至瓜州二百里西至吐蕃界三百里北

至伊州七百里治敦煌縣又有豆盧軍神龍元年置在州城內宋景祐二年趙元昊取沙州元太祖二十二年破其城至元十四年復立沙州十七年升爲沙州路總管府明永樂初置沙州衛正統十一年廢

### 古長城

在沙州城北數百里由鎮夷東狼心山北至哈密北山皆有長城墩臺基址或云漢路博得所築或云近代爲之雖不可考遺址猶存

### 玉門關

韋昭云玉門關在龍勒縣界敦煌西北百餘里則應在沙州西北今其遺址不可考矣石晉高居誨使於闐記曰肅州渡金河西百里出天門關又西百里出玉門關漢班昭爲兄超上疏但願生入玉門關即此按居誨所記乃光武絕西域移玉門關於酒泉非舊玉門關也

### 陽關廢縣

在沙州衛西南一百五十餘里漢書西域三十六國東則阨以玉門陽關地理志龍勒縣有陽關玉門關皆都尉治晉置陽關縣屬敦煌郡後省元和志陽關在壽昌縣西六里以居玉門關之南故曰陽關本漢置謂之南道西趨鄯善莎車後魏嘗於此置陽關縣周廢五代高



居誨使於闐記出玉門關入吐蕃界西至沙州南十里鳴沙山又東南十里三危山乃西渡都鄉河至陽關是也

罕東衛

在赤斤蒙古西南本漢敦煌郡地明洪武末酋長鎖南吉刺思遣使入貢立罕東衛授之與赤金哈密同主西域各國貢道至宏治中土魯番據哈密侵掠鄰境諸部皆不能支正德中蒙古大酋入青海罕東益遭蹂躪其衆益衰後土魯番犯肅州罕東復殘破相率求內徙其城遂棄不守

罕東左衛

在沙州衛故城明成化時建初罕東部人俺章與種族不相能數仇殺乃率其衆逃居沙州耕牧部落日蕃益不受罕東統屬至其子班麻思結久住沙州朝廷屢勒還本衛不奉命正統中沙州全部內徙思結遂盡有其地孫只克嗣職部衆稍盛時土魯番侵據哈密只克請自立一衛與相抗乃置罕東左衛宏治末瓦剌及安定部人大掠沙州只克不能自存正德中其子乞台被土魯番迫脇徙肅州塞內其部下帖木哥土巴二人仍居沙州服屬土魯番會番酋徵求苛急嘉靖初率所部來歸沙州遂爲土魯番所有



安定阿端二衛

在罕東衛西沙州衛南本韃靼別部其地廣袤千里無城郭廬舍明洪武七年安定王小煙帖木兒遣使入貢立安定阿端二衛永樂中其孫亦叛丹來朝成化中爲土魯番殘破正德七年亦卜刺破安定據其地餘衆內徙嘉靖初復命部酋領其衆然安定王後無傳而阿端久沒莫知其處

曲先衛

在安定衛西古西戎部落明洪武四年置曲先衛授土酋散西思永樂四年徙治藥王灘宣德以後屢入朝貢成化中爲土魯番所擾率部屬內徙遂失故地

在西寧備考

以上二條據沙州志附入安定阿端曲先三衛

雷音寺

卽千佛洞在城南四十里不知建自何時有斷碑云唐年重修疏岩鑿石佛龕層疊無算其像有裝塑者有繪畫者以數萬計廟貌甚麗明時回人蹂躪佛像屢遭毀壞龕亦爲沙所掩而畫壁丹青尙有存者今道人等梳爬略見眉目四月八日戶民爲浴佛之會香火稱盛其斷碑碑額篆書十二字唐宗子隴西李氏再修功德記碑文首一行漫漶自第二行至二十

六行雖有剝落猶可讀其文曰

缺歸唐

缺右散騎常侍英髦驥

缺皆

缺稽古微言留心儒素

或登華第更高拔幟之名又戰

缺

堂每中甲科之的雖云流陝居戎而不墜弓裘缺猶次將

軍之列子既承恩鳳闕父乃擢處貂蟬朱門不愧於五侯樹戟崇隆於貴族至其源分特秀

門繼簪裙家承九錫之枝流派祥雲之

缺

時遭西陲汨

缺

至德年中十郡土崩殄絕玉關之

路凡二甲子運偶大中之初中興啓運是金星耀芒之歲皇化溥洽通乎八紘遐占雪山綿

邈萬里府君春秋纔方弱冠

缺

文藝卓犖進止規常迥然獨秀時則妻父河西隴右一十一

州節度管內觀察處置押蕃落營田度支等使金紫光祿大夫特進食邑二千戶實封三百

戶賜紫金魚袋

缺

南陽張公諱義潮慕公之高望藉公之文武於是乃爲秦晉遂申伉儷之

儀將奉承祧世祚潘楊之美公其時也始蒙表薦因依獻捷親拜彤庭宣宗臨軒

缺

所以公

具家牒面奏玉階上亦冲融破顏群公愕視乃從別勅授涼州司馬檢校國子祭酒兼御史

中丞賜紫金魚袋錫金銀寶貝詔命陪臣乃歸戎幕

缺

餘載河右磨戈拔幟挾囊龍韜盡展

克復神烏而一戎衣殄勅寇於河蘭馘獯戎於瀚海加以隴頭露卷金河湍湍瀨之波蒲海

梟鯨流沙砲列烽之患復天

缺

孫致唐堯之壽域晏如也

缺

百城無拜井之虞十郡豐登吏

士賀來蘇之政此乃三槐神異百辟稀功英雄半千名流萬古公又累蒙朝獎恩渥日深方

用堅磐石勳猷未缺俄已云亡享齡五十有二終於敦煌之私第亡叔僧妙弁在蕃以行

高才峻遠過瞻依名達戎王贊普追召特留在內兼假臨壇供奉缺擅持談柄海辯吞流恩

洽敦煌缺高僧寶月收以爲儔僧叟餘蹤扇於河隴亡妣汜氏太夫人龍沙鼎鼐盛族孤標

庭訓而保子謀孫軌範而清資不缺承家建業薦累代而揚名閱聯綿長緒帝王之室今

乃逝矣佳譽存焉故府君贈右散騎常侍生前遇三邊無警四人有暇於東臯命駕傾誠謁

先人缺剎迴顧粉壁念疇昔之遺蹤瞻禮玉毫歎紅樓之半側豈使林風透闥埃塵寶座之

前峴嶺陽烏曝露茶毗之所嶮道之南復有當家三窟今亦重修巨金華石缺籀存焉於是

乃募良工訪其杞梓買材運斧百堵俄成魯國班輪親臨勝境雲霞大豁寶砌崇墉未及星

環斯構矗立雕簷化出巍峨不讓於龍宮缺軒繞缺於日際其功大矣筆何宣哉亡兄河西

節度衙推兼監察御史明達天與孤貞松筠比節懷文挾武有張賓之策謀破虜擒奸每得

玉堂之術會朝絳闕敷奏金鑾指畫山州盡縱橫於天險兄明德任沙州錄事參軍操持吏

理六曹無阿黨之言深避四知切慕乘缺之咏兄明詮敦煌處士今古滿懷灑落卿雲之缺

先效義光騰喬露之文五柳閒居慕逍遙於莊老夫人南陽郡君張氏卽河西萬戶侯太保

張公第十四女溫雅和雅暢淑德令聞深遵陶母之仁至切齊眉之操先君歸覲不得同赴於

京華外族流連各分飛於南北於是兄亡弟喪社稷頃淪假手託孤幾辛勤於苟免所賴太

保神靈缺恩勦斃重光嗣子再整缺雖手創大功而心全弃致見機取勝不以爲懷乃義立

姪男秉持旄鉞總兵戎於舊府樹勳績於新墀內外肅清缺豪屏迹慶豐山湧呈瑞色於朱

軒陳霸動容缺壯室四方嚮義信結鄰羌運籌不媿於梓橦貞烈豈慙於世婦間生神異成

太保之徽猷雖處閨門實謂丈夫之女然栖心悟道併棄樊籠巡禮僊巖願圖缺於時頓捨

青臆市紫金於上國解瓔珞棄珠珍銷金鈿於廊廡運虛豪於庭際乃得玉毫朗耀光衝有

頂之峯寶相發輝直抵大羅之所長男使持節沙州刺史兼節度副使檢校右散騎常侍御

史大夫上柱國宏愿輔唐憂國政立祥風忠孝頗懇於君親禮讓靡忘於伯玉六條布化千

里隨車人歌來暮缺紹襲黃之績次男使持節瓜州刺史墨離軍押蕃落等使兼御史大夫

宏定文武全材英雄賈勇晉昌要險能布頗牧之威巨缺野大荒屏盪匈奴之迹缺士卒混

燧不媿於襄陽都河自注神知有道之君積貯萬箱東郡著雕金之好次男使持節甘州刺

史兼御史中丞上柱國宏諫飛馳拔拒唯慶忌而缺穿楊非由基而莫比洎分符於張掖政

恤惇孤布皇化於專城懸魚發詠次男朝議郎前守左神武軍長史兼侍御史宏益三端俱

備缺精通工書有缺札連芳於射戟缺特達文雅而德種玉音於時豐年大稔星使西臨親

抵敦煌頒宣聖旨內常侍缺玉裕缺克珣副倅師大夫稱齊琪判缺忠回偕缺區密杞材遐

耀天威呈祥塞表因鑿樂石共紀太平余所不缺然狂簡缺年歲在甲寅十月庚申朔五日

甲子

右至狂簡字其文已完後特記年月攷甲寅歲昭宗乾寧元年也後尙有二行俱剝落隱  
見官號字較密於前然多不可識矣按此碑所謂涼州司馬檢校國子祭酒兼御史中丞者  
姓李氏唐之宗族名闕不可考其妻父則唐歸義軍節度使張義潮也考唐史義潮降唐在  
宣宗大中五年發兵略定河西十郡令其兄義澤奉圖籍以獻宣宗因於沙州置歸義軍以  
義潮爲節度使鎮之咸通四年克復涼州八年朝京師文中叙李君戰功雖涉鋪張然大約  
從義潮與有勞績者至再修功德味其文義蓋李氏之先曾於千佛巖建有寺宇李君之父  
贈右散騎常侍者重爲整理後李君之妻義潮女南陽郡君又於巖窟繪畫佛像故云再修  
因作此記備載李氏三世宦閣政事及修寺梗概刻石置洞中今寺已久湮而圖畫極工以  
不見風日金碧粉墨之色不變與此碑同爲塞外舊觀也

此碑於千佛洞僧壁得  
揭本字跡不佳

南山

在河西四郡之南起武威歷張掖過酒泉逾敦煌走西域延袤數千里西羌種落多居於此



漢時有月氏者本行國也隨畜移徙與匈奴同俗居敦煌祁連間冒頓兵強攻破月氏而老  
上單于殺月氏王以其頭爲飲器月氏衆乃遠去西擊大夏而居之其餘小衆不能去者保  
南山羌號小月氏史記大宛傳張騫自大夏還並南山欲從羌中歸又匈奴渾邪王降而金  
城河西並南山至鹽澤空無匈奴漢志西域南北有大山東出金城與終南山相屬西河故  
事祁連燕支二山在張掖酒泉二界上東西二百餘里南北百里有松柏五木美水草冬溫  
夏涼宜畜牧匈奴失二山乃歌曰亡我祁連山使我六畜不蕃息失我燕支山使我婦女無  
顏色肅州新志南山之陽又有雪山四時積雪春夏融消冰水入河以灌田畝自涼州連亘  
至此皆曰祁連卽天山也史漢及今亦通稱南山 按漢志西域南北有大山卽新志所云  
南山之陽又有雪山其說近是今塞外屯田亦全資積雪融水灌田非謂哈密北山古稱祁  
連山匈奴下馬拜者亦與南山相屬也或以其勢蜿蜒高聳雲表故稱天山而因以祁連爲  
號數歟

天山

伊吾郡有天山高十五里廣六十里冬夏積雪不消一名雪山又名祁連山匈奴稱天爲祁  
連過皆下馬拜焉漢驃騎將軍霍去病與公孫敖將數萬騎踰居延過小月氏至祁連山斬



胡首三萬餘級虜獲尤多又貳師將軍李廣利將二萬騎出酒泉擊右賢王於天山得虜萬騎而還後漢竇固以奉車都尉與耿忠率萬二千騎出酒泉至天山擊呼衍王斬首千餘級呼衍王走留吏士屯伊吾盧城即此地也漢書註云天山一名雪山在伊州北元和志一名析羅漫山在伊吾縣北一百三十里肅鎮舊志在土魯番西北三百餘里余嘗至哈密見城北有雪山按之圖說訪之土人此爲哈密北山卽古稱天山爲祁連山者也哈密之北爲巴里坤而天山實界其中在哈密則稱北山在巴里坤又稱南山自哈密東北塔爾納沁起延袤而西至土魯番西北有博克達山者至今相傳夷人過此猶下馬拜云其塞外一帶南山由甘涼肅延袤數千里至於羅布腦兒之南如肅州新志所云東連終南西極崑崙綿亘不絕莫見首尾者與哈密北山相去遼絕勢難聯屬蓋緣南山之外又有南山中隔平川數道通柴達木噶斯路徑而皆有積雪今人多以南山雪山合稱而并以祁連山天山統爲一山不知近者爲南山遠者爲雪山亦名天山而匈奴下馬之處則在土魯番西北之博克達山卽哈密北山延袤至此與漢書註在伊州之北及舊志在土魯番西北者脗合備詢瓜州之札薩克公額敏和卓言之頗詳因附識於此

瀚海

地皆砂磧肅州志云魯陳一名柳城亦漢車師前王地後漢班勇將兵出屯柳中卽此唐爲西州屬邑名柳中縣去哈密千里中經大川沙磧無水草馬牛過此輒死大風條起人馬相失道旁多骸骨有鬼魅行人失侶白日迷亡夷人謂之旱海唐書地里志北庭大都護府有瀚海軍通志云經前庭縣有大沙海名瀚海在柳中東南九十里亦名旱海

巴里坤

一名巴爾庫爾在哈密北三百餘里有天山爲界山北之陰則巴里坤山南之陽則哈密其山直至土魯番千餘里不絕明哈密舊志瓦刺在其北百里又云北山有小列禿楚七克列數種強虜時擾哈密則此地之利害關乎哈密明矣本朝自康熙五十四年因澤旺阿喇蒲坦侵犯哈密出師征討屯兵於此尙未建有城堡雍正九年議西北兩路卡倫外各建築一城西路則在巴爾庫爾分築東西兩小城去其南百餘里有南山蒙古謂山爲達坂峻極而狹不可以行車糧運紆道而前八月以後冰雪載塗盤運維艱人甚苦之大將軍查公相度山形命主事阿公炳安開鑿以通之阿公隨山成道爲數十折以達於頂欄楯水道備焉車行若不知有陟降者山之巔得唐碑一長可八尺其形方四面有字字多殘缺可摹得者其文云昔匈奴未滅竇將軍勒燕山之功闡越未清馬伏波樹銅柱之績然則振英風於絕

域申狀節於殊方缺騰缺於千秋播芳猷於萬古者矣大唐德合二儀道高五帝握金鏡以

朝萬國調玉燭以馭兆民濟濟衣冠煌煌禮樂車書順軌扶桑之表皆同治化所沾濛汜之

鄉咸暨苑天山而池瀚海開北戶以靜幽都莫不解辮髮於藁街改左袵於夷邸高昌國者

漢屯田之舊壁遺兵之所居麴文泰卽其酋豪也往因晉室多難群雄競馳中原之主邊障

遂隔間屆缺玉歷缺自王威遠被稽顙來庭雖沐仁風情懷首鼠杜遠方之職貢阻重譯之

缺肆豹狼之心起蜂蠆之毒發徒聚衆兵缺攻無已聖上愍彼蒼生申茲弔伐乃詔使持節

光祿大夫吏部尙書陳國公侯君集交河道行軍大總管左屯衛大將軍上柱國永安郡開

國公薛萬鈞副總管左屯衛將軍上柱國通川縣開國男姜行本等爰整三軍張行天討但

妖氛未殄將軍逞七縱之威百雉佔圍英奇申九攻之略以通川公深謀閒出妙思縱橫命

前軍營造攻具乃統沙州刺史上柱國望都縣開國侯劉德敏右監門中郎將上柱國淮安

縣開國公衡智錫左屯衛中郎將上柱國富陽縣開國伯屈昉左武侯郎將李海岸前開州

刺史時德衡右監門府長王進威等並率驍雄鼓行而進以貞觀十四年五月十日師次伊

吾時羅漫山北登里缺所未盈旬月克成奇功伐木則山林殫盡叱咤則川谷蕩薄衝梯蹙

缺百櫓冰缺機檜一發千石雲飛墨翟之術無施公輸之妙詎比大總管運籌帷幄繼以中

軍鐵騎巨原野金鼓動天地高旗蔽日月長戟彗缺雲自秦漢出師以來未有如斯之盛也

班定遠之通西域故迹罕存鄭都護之滅車師空聞前史雄圖世著彼獨何人乃勒石紀功

傳諸不朽其詞曰於赫大唐受天明命化齊得所功無與競荒服猶阻夷君不定乃拜將軍

殄茲梟獍其一六奇動思群雄逞力陣鬥龍缺營缺麗星光旗明日色揚旌塞表振威西極

其二峨峨峻嶺渺渺平原寒雲冥結胡風畫昏長征缺高樹缺銘切讚德缺以下大唐貞觀十

四年歲次庚子六月丁卯朔二十五日辛卯瓜州司法參軍河內司馬缺

土魯番

漢車師前王之地在唐爲交河縣乃西州交河郡之屬縣而非郡治也漢書云自伊吾通前

部高昌壁千二百里明舊志云土魯番一名土爾番治古交河縣安樂城在哈密西千五百

里火州西百里今略云在哈密西八百餘里至肅州一千八百五十里卽漢車師前部之交

河城屬火州其地平衍四面皆山氣候多暖少雨雪宜麻麥有瓜果羊馬之利人皆屋居明

永樂六年番僧清來率其徒來朝命爲國師其徒法泉等爲僧綱司歷年朝貢十三年授其

酋長爲都督指揮等官宣德正統天順間皆恭順成化初阿力始強控弦五萬自稱速檀華

言王也九年攻破哈密宏治元年阿黑麻誘殺哈密王罕慎四年以哈密來歸明年復攻執

哈密王陝巴遂自稱可汗略罕東諸衛七年朝議閉關絕貢八年阿黑麻以絕貢失互市窘急乞歸陝巴貢如舊正德元年滿速兒逐哈密王并牙郎據哈密既而還之八年復據哈密十一年寇肅州大掠而還嘉靖三年入寇直抵甘州四年犯肅州八年復據哈密耕種沙州隆慶中馬速麻嗣自是朝貢不絕本朝定鼎累世恭順康熙雍正間澤旺悖叛既侵哈喇沙兒漸次及於土魯番頻加擾害移於魯古慶以避之猶不得免雍正四年侍讀學士顧魯招出頭目拖克拖馬木忒等六百餘人安插威虜九年我兵分遣提鎮援之駐兵魯古慶賊遁旋據回目額敏和卓墾請內附移於瓜州築堡授田以安插之紀其部落則有魯古慶泗爾堡哈喇火州木爾兔蘇巴什勒小阿斯述桂洋海土域溝雅圖溝等名自額敏和卓內附土魯番之十七城殆虛無人矣其後逃散回民陸續言旋者就原居地土稍稍四集繕治房舍自相保聚聞現今有回民分住八堡中戶口多寡不等猶服屬於準噶爾種地納糧交納有棉花葡萄等項又一錄云土魯番回子在哈密西所屬有十七城在東者有皮靴罕杜勒木僅蘇伯西包木僅木爾兔魯克蘇伯西在東南者有魯普秦自赫土郁克哈拉合酌案吉烟在西者有了兒葉木西布堪托克損其衆三四萬人曾日常居土魯番城或駐哈拉合酌即明之火州也



右敦煌雜鈔二卷葉河常鈞所輯自清季莫高窟發現寶藏以來中外人士往天山南北路者踵趾相接而敦煌之名亦遂震於天下昔在唐代與西域往來頻繁文化稱盛元明之世西徼荒遐視爲甌脫人蹟亦疏故文字載記流傳絕少滿清入主中原奮其兵威邊裔賓服設官置常加以經理乾隆初年通志邑乘均有纂修然猶未能綦詳也乾隆四年常氏觀察是邦遂就見聞銳意補苴凡肅州新志各地舊志以及當地人士之言談身所經歷之事狀咸加采摭哈密巴里坤及吐魯番屹然爲甘肅襟要今皆新疆地而當時均直隸安西道故敘述亦多其於沿革建置山川城堡諸端著錄完備道光間蘇履吉志無此詳也二十六年五月顧廷龍跋